

Öise Lade 12-2011, p. 54

Cumenzà ha tut curt suenter Pasca durant in viadi en l'Italia. Jau gieva tut patgific tras ina fiera e tuttenina hai jau vis el: fin, lung ed oransch! Igl è stà amur a prima vista. In pau pli tard aveva jau el enturn culiez, gieva tut loscha sper ils stans vi, giudeva sias charsinadas e saveva: jau hai il pli bel da tuts!



Mia nov'amur

Nus essan sesids vi d'ina maisa ed jau hai empustà – co pudessi er esser auter – in magiel Aperol Spritz, la bavronda da trend da questa stad! Jau bagnava da temp en temp mes lefs en la bavronda dultschamara e sentiva co che in u l'auter gut daguttava giu sin el. El tschitschava si minga cural ed al enserrava. Suen-ter quel refrestg al hai jau prendì per il maun ed hai cuntinuà mia spassegiada. Flanond tras la fiera hai jau vis anc bliers auters bels accompagnaders oranschs. A chasa sun jau lura turnada cun in'entira retscha da novs marus: in pèr chalzers, ina tastga, in anè e sa chapescha el, mes bel fular da glin. Il 2011 è pelvaira stà mes onn oransch e perquai è era mes pignol da Nadal ornà quest onn cun cullas e bindels en quella color. La saira da S. Silvester vegn jau medemamain a festivalar sut il motto «oransch». Mancar na dastga en nagin cas l'Aperol Spritz. Il recept per questa bavronda gustusa chattais Vus en quest magazin. Savais Vus gia tge color ch'è trumf l'onn 2012? Jau bain, pertge che jau prolunghesch simplamain mia fasa oranscha anc per in tempet.

In bun onn nov plain color e stai bainin!



Angela Schmed

